

ZAKON

O IZMJENAMA I DOPUNAMA ZAKONA O PUTNIM ISPRAVAMA BOSNE I HERCEGOVINE

Član 1.

U Zakonu o putnim ispravama Bosne i Hercegovine ("Službeni glasnik BiH", br. 4/97, 1/99, 9/99, 27/00, 32/00, 19/01, 47/04, 53/07 i 15/08) član 1. mijenja se i glasi:

"Član 1.

Ovim zakonom propisuju se vrste i oblik putnih isprava Bosne i Hercegovine, organi nadležni za izdavanje putnih isprava, postupak izdavanja putnih isprava i centralna evidencija i personalizacija putnih isprava Bosne i Hercegovine (u dalnjem tekstu: Zakon).

Član 2.

U članu 2. iza stava 1. dodaje se novi stav 2. koji glasi:

"Državljanstvo BiH dokazuje se svim putnim ispravama propisanim ovim Zakonom, osim putnom ispravom za izbjeglice, putnom ispravom za lica bez državljanstva i putnim listom za strance, koji ne potvrđuju ni prepostavljaju državljanstvo nosioca."

Član 3.

U članu 3. iza stava 1. dodaje se novi stav 2. koji glasi:

"Strani državljeni koji imaju priznat status izbjeglice u Bosni i Hercegovini imaju pravo na putnu ispravu za izbjeglice, lice bez državljanstva koje ima odobren boravak u Bosni i Hercegovini ima pravo na putnu ispravu za lica bez državljanstva, a strani državljeni imaju pravo na putni list za strance, u skladu s ovim Zakonom i Zakonom o kretanju i boravku stranaca i azilu."

Član 4.

Član 4. mijenja se i glasi:

"Član 4.

Putne isprave za državljane BiH u smislu ovog Zakona su: pasoš, diplomatski pasoš, službeni pasoš, zajednički pasoš, putni list, pomorska, odnosno brodarska knjižica i drugi dokumenti kojima se, u skladu s međunarodnim ugovorima, omogućava putovanje državljana BiH u inozemstvo.

Državljanin BiH može imati samo jednu putnu ispravu iste vrste.

Putne isprave za strane državljane u smislu ovog Zakona su: putna isprava za izbjeglice, putna isprava za lica bez državljanstva i putni list za strance."

Član 5.

U članu 5. u stavu 1. na kraju teksta briše se tačka i dodaju riječi: "osim dokumenata predviđenih bilateralnim i multilateralnim ugovorom."

Stav 2. briše se.

Član 6.

Član 8. mijenja se i glasi:

"Član 8.

Putnu ispravu smije upotrebljavati samo lice na čije ime je izdata.

Nositelj putne isprave državljanin BiH mlađi od 14 godina, odnosno poslovno nesposobna lica mogu putovati u inozemstvo u pratnji jednog ili oba roditelja ili zakonskog zastupnika, odnosno staratelja, odnosno mora imati saglasnost oba roditelja ili zakonskog zastupnika, odnosno staratelja, ovjerenu kod nadležnog organa, ako putuje u pratnji drugog lica. Saglasnost oba roditelja nije potrebna u izuzetnim slučajevima, propisanim u članu 18. stav 3. ovog Zakona."

Član 7.

Iza člana 8. dodaje se novi član 8a. koji glasi:

"Član 8a.

Pasoš, diplomatski i službeni pasoš sadrži beskontaktni elektronski memorijski element.

Oblik, sadržaj i minimalne zaštitne elemente obrasca pasoša iz čl. 6. i 7. ovog Zakona propisat će Ministarstvo civilnih poslova BiH.

Format i sadržaj podataka u elektronskom memorijskom elementu, način evidentiranja, način čitanja i zaštite podataka koji se nalaze na elektronskom memorijskom elementu propisat će organ nadležan za vođenje centralne evidencije, u skladu sa zakonom koji regulira oblast centralne evidencije i razmjene podataka.

Organ nadležan za vođenje centralne evidencije je, u skladu sa zakonom koji regulira oblast centralne evidencije i razmjene podataka, certifikaciono tijelo zaduženo za uspostavljanje sistema elektronskog pasoša i razmjenu podataka i propisat će tehničke procedure za uspostavljanje sistema elektronskog pasoša i razmjene podataka.

Organ nadležan za vođenje centralne evidencije, u skladu sa zakonom koji regulira oblast centralne evidencije i razmjene podataka, definirat će tehničke uvjete za zaštitu podataka kod nadležnih organa za izdavanje putnih isprava."

Član 8.

U članu 10. stav. 4. i 5. brišu se.

Iza stava 3. dodaje se novi stav 4. koji glasi:

"Vođa grupe upisan u zajednički pasoš mora imati vlastiti pasoš."

Dosadašnji stav 6. postaje stav 5.

Član 9.

U članu 13. u stavu 1. tačka 3. mijenja se i glasi:

"3. Ministarstvo vanjskih poslova BiH."

U stavu 1. dodaje se nova tačka 4. koja glasi:

"4. Ministarstvo sigurnosti BiH."

Iza stava 3. dodaje se novi stav 4. koji glasi:

"Putnu ispravu za izbjeglice, putnu ispravu za lica bez državljanstva i putni list za stranca izdaje Ministarstvo sigurnosti BiH."

Član 10.

U članu 16. stav 2. mijenja se i glasi:

"Izgled i sadržaj obrasca zahtjeva za izdavanje putne isprave iz čl. 6. i 10. ovog Zakona i za službene pasoše propisuje Ministarstvo civilnih poslova BiH. Ministarstvo vanjskih poslova BiH propisuje izgled i sadržaj obrasca za izdavanje diplomatskog pasoša i putnog lista. Ministarstvo sigurnosti BiH propisuje izgled i sadržaj zahtjeva za izdavanje putne isprave za izbjeglice, putne isprave za lica bez državljanstva i putnog lista za strance."

Član 11.

Član 17. briše se.

Član 12.

U članu 18. stav 1. mijenja se i glasi:

"Zahtjev za izdavanje putne isprave podnosi se lično. Način preuzimanja putnih isprava bit će propisan posebnim aktom Ministarstva civilnih poslova BiH."

Iza stava 4. dodaje se novi stav 5. koji glasi:

"Putni list za državljanе BiH i putni list za strance može i po službenoj dužnosti izdati nadležni organ."

Član 13.

U članu 19. stav 1. mijenja se i glasi:

"Uz zahtjev za izdavanje putne isprave podnosič zahtjeva daje na uvid ličnu kartu ili drugu javnu ispravu iz koje se može utvrditi identitet, prebivalište i dokaz o državljanstvu. Organ nadležan za vođenje centralne evidencije, u skladu sa zakonom koji regulira oblast centralne evidencije i razmjene podataka, propisat će načine elektronske provjere podataka sa zahtjeva."

Iza stava 1. dodaje se novi stav 2. koji glasi:

"Ukoliko podaci o JMB državljanina BiH podnosioca zahtjeva nisu evidentirani kod organa nadležnog za vođenje centralne evidencije JMB, tada se mora podnijeti zahtjev za evidentiranje ili određivanje JMB u skladu sa Zakonom o jedinstvenom matičnom broju."

Dosadašnji stav 2. koji postaje stav 3. mijenja se i glasi:

"Uz zahtjev za izdavanje putne isprave podnosič je dužan dati lične biometrijske podatke (slika, otisak prsta, potpis) i priložiti dokaz o plaćenoj cijeni putne isprave. Organ nadležan za vođenje centralne evidencije, u skladu sa zakonom koji regulira oblast centralne evidencije i razmjene podataka, propisat će načine uzimanja biometrijskih podataka."

Stav 5. mijenja se i glasi:

"Postupak, cijenu i nadležnost organa za izdavanje putnih isprava u kraćem roku od propisanog u prethodnom stavu ovog člana propisat će Ministarstvo civilnih poslova BiH."

Iza stava 6. dodaje se novi stav 7. koji glasi:

"Izuzetno od stava 1. ovog člana, uz zahtjev za izdavanje putne isprave za strance, podnosič zahtjeva daje na uvid dokumente predviđene propisom donesenim na osnovu Zakona o kretanju i boravku stranaca i azilu."

Dosadašnji st. 3., 4. i 5. postaju st. 4., 5. i 6.

Član 14.

Član 19b. mijenja se i glasi:

"Organ nadležan za izdavanje putne isprave će, na zahtjev nosioca putne isprave, izvršiti zamjenu putne isprave."

Član 15.

U članu 25. iza stava 1. dodaje se novi stav 2. koji glasi:

"Organ koji vodi centralni registar, u skladu sa zakonom koji regulira oblast centralne evidencije i razmjene podataka, propisat će:

- a) način zaštite podataka o izdatim putnim ispravama u centralnoj evidenciji,
- b) način dostavljanja podataka i razmjene podataka o izdatim putnim ispravama između centralnog registra i nadležnih organa,
- c) način skladištenja obrazaca putnih isprava i distribucije personaliziranih i nepersonaliziranih obrazaca,
- d) standarde zaštite na lokacijama na kojima se predaju zahtjevi za izdavanje putnih isprava kod nadležnih organa."

Član 16.

U članu 25a. stav 1. mijenja se i glasi:

"Novčanom kaznom u iznosu od 100 KM do 400 KM kaznit će se za prekršaj."

Tačka 1. mijenja se i glasi:

"1. Ko pređe ili pokuša da pređe preko granice Bosne i Hercegovine s nevažećom putnom ispravom."

Iza tačke 3. dodaje se nova tačka 4. koja glasi:

"4. Državljanin BiH koji pređe preko granice Bosne i Hercegovine s putnim ispravama koje nisu uređene ovim Zakonom ili s ličnom kartom koja nije lična karta državljanina BiH."

Stav 3. briše se.

Član 17.

U članu 25c. riječ "entitetskim" briše se.

Član 18.

Član 26. mijenja se i glasi:

"Član 26.

Nadležni organi definirani članom 13. ovog Zakona dužni su da dostavljaju podatke u centralni registar putnih isprava koji će se uspostaviti u skladu sa zakonom koji regulira oblast centralne evidencije i razmjene podataka u Bosni i Hercegovini."

Član 19.

Član 27. mijenja se i glasi:

"Član 27.

Organ nadležni za izdavanje putnih isprava dužni su odmah evidentirati podatke u centralni registar o oduzetim, izgubljenim, uništenim ili ukradenim putnim ispravama. Organ koji vodi centralnu evidenciju definirat će načine dostave podataka."

Član 20.

Član 28. mijenja se i glasi:

"Član 28.

Organ koji vodi centralnu evidenciju putnih isprava nadležan je za personalizaciju i skladištenje putnih isprava, diplomatskih putnih isprava i službenih putnih isprava. Organ koji vodi centralnu evidenciju putnih isprava nadležan je za nabavku i održavanje opreme za unošenje ličnih podataka u obrasce putnih isprava, opreme za centralnu evidenciju i skladištenje obrazaca putnih isprava.

Ministarstvo civilnih poslova BiH će posebnim aktom propisati nadležnost i način nabavke obrazaca putnih isprava propisanih ovim Zakonom.

Organ koji vodi centralnu evidenciju će posebnim aktom definirati pravila i procedure vezane za transport putnih isprava do organa određenih članom 13. ovog Zakona.

Organ koji vodi centralnu evidenciju će posebnim aktom definirati standarde za nabavku i održavanje opreme preko koje organ definiran članom 13. ovog Zakona unosi podatke u centralni registar.

Ministarstvo civilnih poslova BiH će posebnim aktom definirati cijene putnih isprava."

Član 21.

Član 29. mijenja se i glasi:

"Putne isprave predviđene ovim Zakonom izdaju se s rokom važenja od pet godina, a licima koja nisu navršila sedam godina života s rokom važenja od tri godine, osim putne isprave za izbjeglice i putne isprave za lica bez državljanstva koje se izdaju s rokom važenja od dvije godine, te putnog lista za državljane BiH i putnog lista za strance koji se izdaju s rokom važenja od 30 dana."

Član 22.

Ovaj Zakon stupa na snagu osmog dana od dana objavljivanja u "Službenom glasniku BiH", a bit će objavljen u službenim glasilima entiteta i Brčko Distrikta BiH. Zakon će se početi primjenjivati po sticanju tehničkih uvjeta, što će biti određeno posebnim aktom Ministarstva civilnih poslova BiH. Putne isprave izdate do dana početka primjene ovog Zakona važit će do roka naznačenog u toj putnoj ispravi.

PSBiH broj 174/08
10. aprila 2008. godine
Sarajevo

Predsjedavajući
Predstavničkog doma
Parlamentarne skupštine BiH
dr. **Milorad Živković**, s. r.

Prvi zamjenik predsjedavajućeg
Doma naroda
Parlamentarne skupštine BiH
dr. **Mladen Ivanić**, s. r.
